



E FIN DI NOS NATURAL BRIDGE

Dos di September 2005 a bira un dia scur pa Aruba su naturalesa y historia. Nos asina promociona, popular y stima Natural Bridge, ta cay den otro. Den cuestion di ora, e noticia a plama rond di Aruba y a keda ricibi como un noticia tragico cerca hopi hende. Tur tabata kier a bay mira kico a keda tras di e creacion di naturalesa cu asina tanto orguyo tabata yena nos. E tabata nos patrimonio, nos atraccion turistico, nos monumento natural, awor un bista diferente cu esun cu nos a lanta y custumbra cune. A pasa loke nos a pensa c'un dia, lo por pasa. Aunke cu net na banda tin un otro brug un poco mas chikito, e nomber Natural Bridge tabata referi mas na e grandi cu tabata habri riba nos laman. Bayendo bek den historia sinembargo, kizas lo bo no topa cu e nomber Natural Bridge of Puente Natural asina facil. Esmas, e tabata un lugar hasta desconoci pa hopi hende pa un bon tempo. No tabata tin un caminda drechi pa yega na dje, y esnan cu despues tabata kier a mir'e, mester a pasa un poco trabou pa yega cerca. Ta piscadornan di e costa di norte tabata e bishitantenan

regular di e lugar aki. Su prome nomber tabata Lakon. Esaki ta nifica e barancanan cu e lava a forma, cua ta e barancanan preto cu nos ta mira ora nos yega cerca. Cu tempo e nomber Lakon a cambia pa Briek. Esaki a pasa ora cu riba un mainta, piscadornan a keda sorprendi di topa c'un barco di tres mast y curpanan di matroosnan riba e baranca aki. A constata c'un Briek – e barco di tres mast- a dal riba Lakon. Asina tambe e nomber a cambia di Lakon, a cambia pa Briek. Consecutivamente cu tempo, nos mesun hendenan a cambia e nomber di Briek pa Natural Bridge of Puente Natural.

Siferiano Luydens alias Chinang, tabata sirbi di guia ora bishitantenan halto di Lago tabata bin Aruba y tabatin un vision pa e lugar aki. Asina tambe el a bira e persona cu a cuminsa cu su tienda pa ofrece na esnan cu tabatin bin mira e obra di naturalesa aki, algo pa refresca nan mes cune. Awe, 36 aña despues, e tienda t'ey, pero e Lakon, Briek of Natural Bridge grandi, ya no t'ey mas aunke su baby, e Natural Bridge mas chikito, ainda ta firme para pa bista y deleite di nos tur.